

## ISUMALIUTISSIISUT

**Sanaartornermut ataatsimiititaliamit tunniunneqartoq.**

**Pineqarpoq;**

**Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UKA2016-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.**

*(Saqq. Inatsisartunut ilaasortaq Nikolaj Jeremiassen, Siumut)*

**Siunnersuutip aappassaaneernissaanut tunniunneqartoq**

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Kalistat Lund, Inuit Ataqatigiit, siulittaasup tullia  
Inatsisartunut ilaasortaq Jens-Erik Kirkegaard, Siumut  
Inatsisartunut ilaasortaq Ane Hansen, Inuit Ataqatigiit  
Inatsisartunut ilaasortaq Justus Hansen, Demokraatit

UKA 2015-ip ingerlanerani ull. 11. november siullermeerereernemi siunnersuut Ataatsimiititaliap misissorpaa.

### **Siunnersuutip imaa siunertaalu**

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UKA2016-mi nassuiaammik saqqummiusseqqunissaat siunnersuuteqarnikkut siunertarinearpoq.

### **Siunnersuutip Inatsisartuni siullermeerneqarnera**

Siunnersuut akuersarneqartariaqartoq siullermeerinermi nalinginnaasumik  
isumataaffigineqarpoq, taamaalillunilu Ataatsimiititaliami sulinermi

nalunaarusiaaratarsinnaasumi suut kissaatigineqarsinnaanersut salliutillugit isiginiarneqassapput.

### **Saaffiginnissutit**

Ataatsimiititaliamut innersuussereernerup kingorna Ataatsimiititaliaq saaffiginnissutinik pisariusunik tigusaqarsimangilaq. Nalunaarutigineqarporli Inatsisartuni partiit tamarmik Eydun Berth Jacobsenimit saaffiginnissummik tigusaqarsimasut. Eydun Berth Jacobsen Imarsiornermi Ilinniarfimmi ilinniartitsinermi saniatigut NORMAR Consultimi namminersorluni siunnersortaavoq, ilaatigullu Savalimmiuni Imarsiornermut oqartussaasuni Søfartsstyrelsimilu ukiorpassuarni misilittagaqartuulluni.

### **Ataatsimiititaliap siunnersuummik suliaqarnera**

Ineqarnermut, Sanaartornermut Attaveqarnermullu Naalakkersuisoqarfik naalakkersuinikkut allaffissornermilu aqutsinikkut imarsiorneq pillugu Danmarkimik pitsaasumik isumaliutigilluakkamillu suleqateqarnera Ataatsimiititaliap toqqissisimanartippaa, kiisalu kalaallit soqutigisaasa pitsaanerpaamik isumagineqarnissaata isumannaarnissaanut Søfartsstyrelsimit annertoqisumik suliaqartoqarnera toqqissimanartillugu.

Siunnersuut una imarsiornermi pissutsinut tamanut attuumassuteqanngitsoq Ataatsimiititaliap maluginiarpa, taamaallaalli Kalaallit Nunaanni Namminersorneq pillugu inatsimmi liste II nr. 20 aamma nr. 21 naapertorlugit immikkoortut “Imaani isumannaallisaaneq” aamma “Umiarsuarnik nalunaarsuineq inatsisillu allat imarsiornermut tunngasut” nunatsinnit tiguneqarnerini sunniutaasussat pillugit nalunaarusiornissamik siunnersuuteqartoqartoq.

Liste II-mi ima oqaasertaliisoqarnikuuvoq:

#### *4.4.25. Imaani isumannaallisaaneq (liste II, nr. 20)*

*Imaani isumannaallisaanermik inatsisikkut malittarisassiuunneqarput umiarsuit assigiinngitsunik ilusillit sananeqartarneri, atortui ingerlannerilu; umiarsuarni sulinermi avatangiisinut tunngasut, umiarsuaatillit umiarsuarnilu naalakkat akisussaaffii, umiarsuarnik tiggumminnikkallarneq, selskabit umiarsuarnik assigiinngitsunut immikkoortiterisartut, umiarsuarnik uuttortaanermt, akuersissutinut, aammalu nakkutilliinermut ingerlatsinermullu tunngasut. Suliassaqarfimmutaaq ilaapput ajutoornernik paasiniaanerit, imaani angallannermt il.il.maleruaqqusat aammalu umiarsuarnik inuttalersuinermik piginnaaneqarnissamillu piumasaqaatit, kiisalu umiarsuarmiunut il.il. tunngasut.*

*Suliassaqarfiit nunat assigiinngitsut akornanni sakkortuunik malittarisassaqaartitaapput, imarisaat nunap nammineq iluani malittarisassiuunneqartarlutik.*

*Imaani isumannaatsuunissamik inatsit, tak. inatsimmik nalunaarut nr. 627, 26. juli 2002-imeersoq, kingusinnerusukkut allannguutilik, aamma umiarsuarmit pillugit inatsit, tak. inatsit nr. 15, 13. januar 1997-imeersoq, kingusinnerusukkut allannguutilik, kiisalu umiarsuarnik uuttortaanermik inatsit, tak. inatsimmik nalunaarut nr. 43, 2. januar 1993-imeersoq, kingusinnerusukkut allannguutilik, tassaapput inatsisit pingaarnerusut. Taakku Kalaallit Nunaannut atortussanngortitaapput ukunuuna: peqqussut nr. 607, 25. juni 2001-imeersoq, kingusinnerusukkut allannguutilik, aamma peqqussut nr. 608, 25. juni 2001-imeersoq.*

*Imarsiornermut qullersaqarfik Kalaallit Nunaanni immikkoortoqarpoq.*

*4.4.26. Umiarsuarnik nalunaarsuineq inatsisillu allat imarsiornermut tunngasut (liste II, nr. 21)*

*Suliassaqarfimmut atapput umiarsuarnut, umiarsuaatilinnut il.il. tunngatillugu piginnittuunermut aningaasaateqarnermullu tunngasut, ilanngullugit umiarsuarnik qularnaveeqqusiussinermut, akisussaanermut sillimmasiinerullu tunngasut, kiisalu assartuinermik isumaqatigiissutit. Suliassaqarfimmutaaq atapput pisortat inatsisaannut eqqartuussisarnernullu tunngasut arlaqartut, ilanngullugit umiarsuit suut danskit erfalasuannik erfalaserlutik angalasinnaanersut, immakut ajutoornermik nassuiaatit il.il., kiisalu umiarsuaatillit nunani allani oqartussaasunut il.il. pissusii.*

*Suliassaqarfimmi inatsisit pingaarnersaraat imarsiornermik inatsit, tak. inatsimmik nalunaarut nr. 538, 15. juni 2004, kingusinnerusukkut allannguutilik, inatsisini allani arlalinni ilassuserneqartarsimasoq. Tamatumani innersuussutigineqassaapput: nunat assigiinngitsut akornanni umiarsuarnik danskit nalunaarsuutaat pillugu inatsimmik nalunaarut nr. 273, 11. april 1997, danskit umiarsuaatillit nunat allani oqartussanut paasissutissiisinaanerata killilersornerannik inatsit nr. 254, 8. juni 1967-imeersoq, aamma gruppit marlukkuutaartut arlalikkuutaartulluunniit nunat assigiinngitsut akornanni usinik assartuutininik umiarsuaatillit ataatsimeersuarneri (liniekonferencer) pillugit inatsit nr. 174, 28. april 1982-imeersoq, kiisalu nunani assigiinngitsuni umiarsuarnik angallannerup iluani qanoq iliuuserisassat pillugit inatsimmik nalunaarut nr. 239, 14. april 1984-imeersoq Kalaallit Nunaannut atortussanngortitaasimannngilaq, kalaallili oqartussat, suliassaqarfik tiguneqassappat, tamakkua assinginik maleruaqqusaliorsinnaapput.*

*Imarsiornermik inatsisip ilai Kalaallit Nunaannut atuuttusanngortitaasimapput peqqussutikkut nr. 8, 15. januar 1996-imi. Inatsit nr. 254, 8. juni 1967-imeersoq inatsimillu nalunaarut nr. 239, 14. april 1989-imeersoq aamma Kalaallit Nunaannut atuupput. Nunat assigiinngitsut akornanni umiarsuarnik nalunaarsuisarnermik danskit inatsisaat siuliinilu liniekonferencit*

*pillugit inatsit Kalaallit Nunaannut atulersitaasimangilaq, suliasaqarfilli  
tiguneqassappat kalaallit oqartussaasut tamatumunnga  
malittarisassiorsinnaapput.*

Taamaalillutik nalunaarusiassatut kissaatigineqartumi ilaatinneqanngillat liste II imm. 19 “Umiiarnerlukut, umiiartoqarnerani usit aamma immani itissutsit ajorseriarneri”, liste II imm. 22 “Nunat assiliorneq”, liste II imm. 23 ” Imartanik nalunaaqutsersuineq, naaralaartitsiviit aamma ilisimasortaqaqarnermut tunngasut” aamma liste II imm. 24 “Imaani avatangiisit”.

Naggasiullugu Ataatsimiititaliap maluginiarpa, nalunaarusiaq naalakkersuisoqarfiit arlallit kiisalu Imarsiornermut ataatsimiititaliami akuusut arlallit suleqatigiinnerisigut suliarineqassasoq naatsorsuutigineqartoq, taamaalilluni nunatsinnit tiguneqarsinnaanerani sunniutaasut attuumassutillit allaaserineqarsinnaassallutik.

Pineqartut isumannaatsumik isumagineqarnissaannut maanna ilinniarsimassutsikkut inuttatigullu isumalluutissaqarnerisugut pillugu apeqqut nalunaarusiami ilanngunneqarsinnaanera Ataatsimiititaliap aamma tulluurtut isigaa, taamaaliorqarsinnaanngippammi isumalluutit pisariaqartut pissarsiarinissaannut iliuseqartoqartariaqarmat.

### **Siunnersuutip aningaasatigut kingunissai**

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuut tunngavilersugaassasoq, aalajangiiffigisassatullu siunnersuutip piviusunngornerani aningaasatigut allaffissornikkullu kingunerisassai allaaserineqarsimassasut.

§ 37 tunngavigalugu siunnersuuteqartup apeqqutigisaanut nr. 2015/196-imut akissut naapertorlugu, Ineqarnermut, Sanaartornermut Attaveqarnermullu Naalakkersuisoqarfik Søfartsstyrelsimut attaveqareerpat Kalaallit Nunaanullu atatillugu aningaasaqarnikkut akissaajaatit pillugit akissutisereernermi, imaani isumannaallisaaneq, umiarsuarnik nalunaarsuineq inatsisillu allat nunatsinnit tiguneqaratarsinnaaneranni akissaajaatit erseqqissaavigineqarsinnaassasut siunnersuuteqartup taanikuuaa.

Tamanna naapertorlugu siunnersuutip piviusunngortinnerani aningaasatigut kingunissai siunnersuutikkut taamaalillutik akineqarsimasut Ataatsimiititaliamit maluginiarneqarpoq, taamaalilluni siunissami Kalaallit Nunaannit tiguneqaratarsinnaanerani akissaajaatit nalunaarusiarineqartussami ilanngunneqarsinnaassallutik.

Nalunaarusiap suliarineqarneranut akissaajaatit sulisup piffissap affaata missaani sulisinneqarnissaanik akeqassanganneqarpoq. Tamannalu 250.000 kr.-t missaaniissanganneqarpoq. Tassunga atatillugu Sanaartornermut ataatsimiititaliap erseqqissaatigerusuppa, nassuiaatip naqiterneranut akissaajaatit, naatsorsuutigisatullu

misissuinernut angalanissat nutserinerlu missingiutini taakkunani ilanngunneqarsimanngitsut. Taamaattorli Attaveqarnermut Naalakkersuisup akissutaani tamanna annertunerusumik taaneqarsimanngilaq, taamaattumillu Ataatsimiititaliap apeqquq tamanna annertunerusumik pulaffigerusunngilaa, maluginiarluguli akissajaatit Naalakkersuisoqarfup missingiusiatut sinaakkusiinerini akilerneqarsinnaassasut.

**Ataatsimiititaliap inassutaa**

**Ataatsimiititaliap siuliani oqaatigineqartut tunngavigalugit siunnersuut akuerineqassasoq inassutigaa.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.

---

Anders Olsen, Siulittaasoq

---

Kalistat Lund,  
Siulittaasup tullia

---

Jens-Erik Kirkegaard

---

Justus Hansen

---

Ane Hansen